



SUAI SUPPLY BASE SAI CENTRU LOGISTIKU BA INDUSTRIA MINARAI NO GAS

SAIDA MAK SUAI SUPPLY BASE (SSB) NE'E?

Suai Supply Base ne'e hanesan Projeitu importante iha Suai mak atu harii portu (parede hodi tahan laloran (breakwater) no ponte kais), area atu tau sasán kímiku, armazén, eskritóriu, area ba tanke kombustivel, fatin heli atu tun, no futuru parke industrial iha Suku Kamanasa, konhesidu ho fatin abastecimentu (logistiku) industria minarai no gas.

OINSA LALAOK PLANU BA ESTABELEMMENTU SUAI SUPPLY BASE (SSB)?

Supply Base Suai nudár parte ida husi vizaun dezvoltamentu Governu nian dezde inísiu 2008, bainhira Sekretário Estado Rekursu Naturais (SERN) trasa politika hodi hari'i "*Mega projeitu ne'ebe pakote husi Supply base, Refinery no planta Liquefied Natural Gas (LNG)*". Baseia mos ba preferensia estudu komparativu ne'ebe governu halo vizita ba iha Lamongan Supply Base, iha Java Leste no vizita kampanha ba iha kompania privadu Eastlog Holding, Pte. Lda, iha Singapura, no estudu komparativu ba Malaysia.

OINSA POLITIKA INVESTIMENTU BA PROJETU TASI MANE IHA COSTA SUL NE'E?

Iha inisiu tinan 2008 IV Governu konstitusional hahu halo politika hodi investe iha area Industria Extractiva (EI), nune'e iha 2008 governu aloka kedas Orsamentu Jeral do Estado (OJE) hamutuk milhoes USD\$32 hodi apoiu planu implementasaun projeitu tasi mane ne'ebe lidera direktamente husi Secretario Estado Rekursu Naturais (SERN), iha tinan 2012 governu kontinua aloka orsamentu ba mega projeitu ne'e hamutuk USD162,8 milloes, no iha tinan 2013 mos governu kontinua aumenta tan orsamentu ho montante USD139,402 milloes no aumenta tan orsamentu Rectifikativu hamutuk USD50 milloes.

MEDIDA RAI BA KONSTRUSAUN SUAI SUPPLY BASE NE'E HECTARES HIRA?

Projeitu Supply Base iha Suku Camanasa ne'e okupa rai komunidade nian iha aldeia Samfuk hamutuk hectares 1113. Ba konstrusaun aeroportu Suai ne'e seoloke luan medida husi 1,050 meter ba 1500 meter, ba nesidade aviaun ho kapasidade (wing, 20 pesoas) seater aircraft, Helicoptro ho kapasidade 15-20 pesoas.

OINSA HO OPSAUN BA IMPLEMENTASAUN PROJETU SUPPLY BASE NE'E?

Agora dadauk governu halo ona diskusaun ho Autoridade local no komunidade konaba oinsa atu implementa projeitu Suai Supply Base ne'e. Bazeia ba resultadu sosializasaun komunidade iha komitmentu no sentidu atu kontribui ba dezvoltamentu nasional pronto ona oferese fatin rai hamutuk hectares 1113 ba governu hodi estabelese Supply Base. Iha kestaun importante nebe sai hanesan preokupasaun komunidade iha prosesu negosiasaun ba estabelementu Suai Supply Base (SSB) ne'e mak oinsa decide fatin ba SSB no oinsa governu bele resolve opsaun ba kompensasaun ba rai, natar, to'os no oinsa muda komunidade ne'ebe afeitadu ba dezvoltamentu Supply base ne'e.

SAIDA MAK VANTAJEM NO DEZVANTAJEM HUSI SUPPLY BASE NE'E BA ESTADU NO KOMUNIDADE?

Vantajem ba Estadu:

Hare'e husi kestaun politika investimentu ba supply base ne'e, vantajem ba TL mak hanesan;

- Dezenvolve seitor Industria Extractiva Timor Leste (TL).
- Sai centru Abastecimentu no logistiku ba Seitor industria minarai.
- Atu fasilita prosesu atividades downstream iha seitor Petroleu TL nian.

Vantajem ba Komunidade:

- Sei fornese obra/servisu ba komunidade sira, Joventude nomos tekniku no enjineriu petroleum.
- Kontribui ba dezvoltamentu sidade distritu Suai nian.
- Kontribui ba dezenvolve ekonomia local no nasional..

Dezvantajem/Risku ba Estadu:

- Estadu no governu investe ho orsamentu ne'ebe bo'ot ba estabelese Supply base ne'e, tuir projeksaun sei aloka orsamentu husi Orsamentu Jeral do estado (OJE) milloes US\$738.9.
- Oinsa resolve ba kestaun realokasaun komunidade, kompesasaun ba komunidade afeitadu.

Dezvantajem ba komunidades:

- Sei hamosu impaktu ambiente ba komunidade, liu-liu iha distritu Suai.
- Hamosu impaktu dis-agregassaun (rai halai), se bainhira akontese udan bo'ot no mota.

Fontes: Audiencia no Presidente & CEO Timor Gap E.P, ANP no Lei/Tratadu CMATS, **website:** Luta Hamutuk, field visit no entrevista ho Autoridade local no komunidade Suco Camanasa, Belecasak, Matai & Labarai.